



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Inter Milan-i goalkeeper
Yann Sommer alizükogo

Ex-PM Imran Khan mendeni
Pakistan election agitsü akok



VOL. XX NO. 298 (ADOK 298)

DIMAPUR YANGTEPNÜ (THURSDAY)

LUROI (AUGUST) 10, 2023

₹ 5.00

Arrla 371(A) ajanga Forest Act 2023 nungi kümzüker: CM Rio

Kohima, August 9, 2023 (TYO): Parliament-i agizükba Forest (Conservation) Amendment Act 2023 ajanga Nagaland-i timtem kecha majurutsü kechiyong asenok 371(A) ajanga kümzüka lir ta Chief Minister Neiphiu Rio-i metetdaksüogo.

"Asenoki teti Arrla 371(A) jembir kechiyong asenok iba ajanga kümzüka lir. Nagaland nung Forest 5% shi ka dang sorkar meyong lir aser tanüngba 95% ya kija aser telok meyong lir" ta CM Rio-i ashi.

"Anungji Forest (Conservation) Amendment Act 2023 dak lendong keta maliba ama onoki bilemer saka onoki maneni iba ya shisadangtsü aser tang atemabo lemet magitsü" ta paisa shisem.

Naga People's Front (NPF)-i sorkar dang rondak Assembly session ka jazüksü mesüra taruba session nung iba Act benoka jembitsü mepishiba atema CM Rio-i "nisung mashi kati ken o benoktsü akok aser asenok olemteptsü" ta ashi.

Nagaland sorkari Forest (Conservation) Amendment Act 2023 anema bangzüng ka agitsüla: Ao Senden

Dimapur, August 9, 2023 (TYO): Ao Senden-i Nagaland sorkar dang special Assembly session ka jazüksü aser Nagaland nung Arrla 371(A) nung ajemdaker Forest (Conservation) Amendment Act 2023 mapa meinyaktsü atema bangzüng ka agitsü ayongzüko.

India nung nisung aser telok balalai Forest (Conservation) Amendment Act 2023 nung onük kar atema tebilemtsütem shiaka Parliament nung iba Act agizükba sülen India Tiria mulunga agizükogo. Anungji Centre notifies-i official gazette nung sangdongba sülen iba Act mapa tenzüksü, ta Ao Senden-i sangdong ka nung ashi.

"Iba Act nung international borders nung aliba Forests kübok 100km nung linük atema tongtipang mapatongtem aser national security dak sendakba mapa inyaksüba ya süoki ia bilemtsüba onük ka lir kechiyong iba ajanga northeast state tem aser talisa Nagaland nung mepetmesü adoktsü akok" ta Tir Chubawati Longchar aser Tongti Tezulur Imtipokiyim nati

sangdong nung shia lir. Forest (Conservation) Amendment Act 2023 ajanga Centre sorkar dang nungi asen li kümzüka meyutettsü, kechiyong village council aser local district ketdangsurtem nungi temelaba kecha magii dang parnoki mapa inyaktettsü. Iba Act ajanga northeast aser link nung forests raksatsütsü, ta Ao Senden-isa ashi.

Naga nunger atema ali ya nübortem meyong lir. Naga yimtsüng shia pei alinük madak tematiba tashi lir. Centre nung ozüng yanglurtemi asenok dang masüngdangtepi aser temelaba magii tashiyim aketba ozüngtem yanglur. Asen ket nungi asen li rakzüksü ozüng yangluba ya loktiyimten inyakyim anema lir aser magizüker, ta parnokisa metetdaksü.

Anungji Nagaland state sorkari tekaratiba nung special Assembly session ka jazüker Nagaland nung Forest (Conservation) Amendment Act 2023 mapa küma meinyaktsü atema bangzüng ka agitsü ayongzüker ta Ao Senden-i tayongzüka agitsüogo.

Kohima Police-i Rs 9 cr alang drugs apu

Kohima, August 9, 2023 (TYO): Taküm January nungi tenzüker Kohima Police-i nisung 35 puogo aser Rs 9 crore alang drugs puogo.

CCTV cameras lapokba sentong nung Kohima Superintendent of Police Imnalensa-i iba osang metetdaksü.

Kohima Police-i Heroin - 7.773 kgs (Rs 8,16,16,000), Yaba drugs - 10,000 tablets (Rs 1.20 crore), Raw Opium - 9 kgs (Rs 5.40 lakh), Cough syrup -

1682 bottles (Rs 4,20,500), Spasmo Proxyvon - 43 tablets (Rs 3,400) aser Alprazolam - 4 (Rs 80) apu aser item jenjang ajak meykotep Rs 9,45,80,020 liasü ta Imnalensa-i ashi.

Tesüba ita ita ishika tsünga tesem balala nung nisung aser drugs apu. Kohima police-i maneni drugs anema inyaksü aser state sorkari 'War on Drugs' sangdongba ajanga iba police department aser talisa Kohima DEF tali akasoa inyaksü ta Kohima SP-isa metetdaksü.

CM Rio-i Kohima police station 7 nung CCTV cameras lapoktsü Tanüngba district tem nunga I-Day nung lapoktsü



August 9, 2023 nü Nagaland Chief Minister Neiphiu Rio-i Kohima Police Stations 7 nung CCTV cameras lapoktsüba angur.

Kohima, August 9, 2023 (TYO): Nagaland Chief Minister Neiphiu Rio-i Bodbarnü Kohima district nung police station 7 atema CCTV cameras 16 lapoktsüogo.

Iba sentong ya Nagaland nung police station tejentiba North Police Station Kohima nung agi. North PS Kohima ya 1939 küm lapok.

"CCTVs enokba atema DGP-i anir police department aser Deputy Chief Minister (Home) Y Patton lenisüba kübok teinyaker ajak nem tenüngsang agütsür. Tanüngba district 15 nung police station 73 nung Minister aser Advisor temi August 15 Independence Day benjungmong nung CCTVs lapoktsütsü" ta CM Rio-i ashi.

"CCTV enokba police modernization nung tongtipang mapa ka lir aser Ministry of Home Affairs-i iba mapatong atema Rs 3.83 crore lemezüksüba atema pelar. CCTV enokba ajanga police tali saksalemtsü aser public den tesentaktep akangshitsü imlar" ta pai ashi.

Police station nung tashiyim inyakba, reshikangshiba aser ozüng alema inyaker ta public-i tsüba bilemer saka CCTV ajanga iba tangatetbaji agientsü, ta CM Rio-isa metetdaksü.

"Nagaland sobaliba nung community system takang lir. Asenok ochishiba, indangindanga noktakba aser meranga inyakba atema tetshir. Yimtsüng, kin aser kidongtemi ozüng alema inyaksangshiba nung tenük yoka azüoker aser sobaliba ozüngtem benshia ken o tem benteta arur" ta Rio-i ashi.

Iba ajanga Nagaland police station tem nung ken o aika benoka mali aser ozüng alema inyaksangshiba aser talisa tetsür dak tashiyim inyakba ken o tem kanga ajema lir ta paisa shisem.

Sorkar department 70-80 shi ka lir saka ajak rongnung tongtipangtibi administration aser police lir, ta pai ashi. Nagaland nung Naga yimten tebilemtsü lir aser tanü asenok memorandum & ultimatums aser deadlines agütsüba lima ka kümogo. Asenok ya tazüngertem aliba loktiliba ka lir saka ano shiameteba loktiliba ka ano maküm lir, ta CM Rio-i tebilemtsü ka lemsatep.

Nübortem aser sorkar tsünga kati ka dak temulung lemteptsü aser külemi Nagaland ya yimjung aliba state ka kümdaktsütsü imlar, ta paisa ashi.

"2047 tashi nung India ya developed country ka akümtsü imlar anungji asen lima nung yimjung bener arutsüla aser developed country nung shilem ka asütsüla. Asenok ozüng akhümtsübuba sensotem asütsüla. Police aser bangdakpurtemia ozüng nungi mejenbuttsü" ta Neiphiu Rio-isa metetdaksü.

Brihostibarnü Cabinet-i Nagaland nung war against drugs atema jembiteptsü aser yakta sangdong ka agütsütsü. Administration, police, excise aser tanga agency temi drug anema mapa inyaksü imlar, ta paisa ashi.

"Asen lanur aser nübortem dang iba khuret ajanga kongshir. Kaketshirtem aser police-ia drugs achir. Police-i iba khuret azüoktsü

atema asalentong süang aser state sorkari iba mapa nung pusemtsü" ta Rio-isa ashi.

NDPS Act ya tayongzüka ka ama benshitsu aker Nagaland nungi drugs & substance abuse agientsüla ta paisa shisem.

"Iba ya CCTV enokba atema dang masü saka asenoki ochishia inyaksüba aser sensotem nem security agütsütsü nangzüka asoshi tongtipang teinyaketba ka lir" ta Deputy Chief Minister Y Patton-i ashi.

Supreme Court-i December 2, 2020 nü tetuyuba agütsüba sülen tashi anga anidaka Kohima district nung police station 7 nung CCTV cameras enoker. Iba ya Constitution nung Arrla 21 nung lateta aliba ama sensotem kümzüka ayutsüba aser temeten agütsüba inyakyim ka lir, ta Patton-i metetdaksü.

"Police station nung electronic surveillance technology bendenlokba ajanga tashi alia amshirtem noktangtsü. Iba ajanga police ket nung nisungtem reshikangshiba azüoktsü aser police inyakyim nung tashishitsü melii inyaktettsü. Ajak dang tongtipangbaji public-i police tsüngdangi oa ken o benoktsü indang security tangatetba ka agütsür" ta paisa ashi.

Iba sentong nung DGP Nagaland Rupin Sharma-i police department tajungba akümtsü mepishia metetdaksü.

"War on Drugs mapa junga inyaka arudar aser police department-i nübortem tonga aoba ajanga ken o tem teimba benokdar" ta Rupin Sharma-i ashi.

UNC-i Framework Agreement mapa akümtsü ayongzüker

Imphal, August 9, 2023 (Agencies): Manipur nung Naga nunger meyirjang aikati Prime Minister dangi Naga Framework Agreement atema memorandum ka züluogo.

United Naga Council (UNC) lenisüba kübok Bodbarnü Manipur tesem balala nung sentongtem ayonga agi aser Deputy Commissioner ajanga Prime Minister dangi memorandum yok.

August 3, 2015 nü India sorkar aser NSCN-IM tsünga sign sütepsba Framework

Agreement mapa küma inyakang ta UNC-i Prime Minister dang metetdaksüogo.

Manipur nung kin kari akhangba atema inyakang "Naga tesemtem" nung mekongshitsüla ta UNC-isa takhangba agütsüogo.

Manipur nung Kuki nungertemi ketdangsubaren balaka meshir aser iba atema UNC-i tekümdangtsüka metetdaksüogo. Manipur nung Kuki aser Meitei nunger rara nung nisung 160 tema süogo.

Tanü UNC-i sentong ayongba

nung Chandel, Tamenglong, Ukhrul aser Senapati district headquarters nung nisung meyirjang aikati shilem agiogo. Item tesem nung Naga nunger aika lir aser security takang yur sentongtem agia liasü.

Parnoki "Translate the Framework Agreement into political reality" aser "Naga areas must not be disintegrated" tezülubatamer shilem agia liasü.

Naga Hoho aser Kuki Inpi Manipur teloktemia UNC-i ayongba sentong pusema nungitba metetdakja liasü.

NSHRC Chairperson-i Central Jail aser East Police Station Dimapur semdang



Nagaland State Human Rights Commission indang Chairperson, Justice Songkhupchung Serto-i August 8, 2023 nü Central Jail aser East Police Station Dimapur semdangba mapang tangokba noksa nung angur.

Dimapur, Luroi/August 09 (TYO): Nagaland State Human Rights Commission indang Chairperson, Justice Songkhupchung Serto-i August 8, 2023 nü Central Jail aser East Police Station Dimapur semdangba liasü.

NSHRC Chairperson inyaksü Songkhupchung Serto shimer Kohima semdangba sülen ibai district tanabuba semdangba alitsü aser ano pai tanungba district ajanga semdangba.

Nagaland State Human Rights Commission ya March 2023 nung danga State Commission

tem den lirumedema amenok. Ibai Human Rights Act 1993 kübok amenokba tentet ka lir.

Iba Commission nem civil court indang tashi agüja lir, koba CPC agi alener aser nisung mashi kati ken o benokba jembitsü aser human rights commission temaba jenjangi ajungkettsü asoshi inyaksü. Commission ya mapa inyak tenzükogo, anungji human rights violation, prevention mesüra protection tsütsü metokmeperi aliba atema Commission dangi aotsü akok.

NSHRC chairperson-i Central Jail aser East Police Station temeket semdangba tepuokdak yua alirtem jenjang asadanga liasü.

State nung SHRC ya March ita kumtet aser meimchir temeden wazüka ayutsü aser Human Rights wazüka ayuba ketdangsur temi mapa shidak inyaker asü masü ta reprangtsü, ta pai ashi.

Human Rights Act nung aibelenba nungi kumzüksü asoshi ketdangsur temi mapang shidak nung mera magira SHRC ajanga item ketdangsur anema ken o benoktsü, ta pai ashi.

Human rights nung aibelenba nokdangtsü asoshi mera peria agi asü masü, mesüra 'working conditions' aser system tali tajungba nung angatetsü mechi pa aser par teloki district sema jajar, ta Serto-i ashi.

Police temi meimchir temeden nung aibelenba atema nisung aikati ashishir, anungji state nung parnok inyakym tali tejangjaba nung metettsü asoshi semdangba. Onoki ki o jen shidak ali-mali mesüra nübu peria ali mali aser tepuokdak alirtem koma amshir, itemji metettsü asoshi senzür, ta pai ashi.

Kohima aser Dimapur nungi tenzüka district ana-aseem lungjemer awareness agütsütsü asoshi seminar tem ayongzüksü aser iba mapang lokti tentet balala nungi lenirtem jaoktsü aser parnok nüburtem nem awareness prokshitsü, ta pai

metetdaksü.

Tang Central Jail Dimapur nung puoka alirtem ya 250 lir aser item rongnung Under trials - 179; NSA- 15; Convicts (R.I)- 43; Convicts (S.I)- 12 aser Foreigner (Nigeria)-1 lir.

Ketdangsurtem den sensaksema mapang tepuokdak healthcare tsütsü tim atema, talisa mental health aser temesepba mozü achirtem asoshi Central Jail nung 'full time' doctor aser nurse tem nungdakba ajitet.

NGOs aser PMKJVY ajanga tailoring, handicrafts, sanitary pad yangluba nung training agütsütsü kanga tongtipang, ta Central Jail ketdangsur temi ashi. Ajidang masü tepuokdak alirtemi yanglutetba osettsüset tem Dimapur nung 77 buba Independence Day nung sayutsü, ta ashi.

August 8, 2023 tashinung East Police Station Dimapur ajanga 'comparative crime statement' agütsüba nung auyaba 84; ashioktsuba 08; tashiyim amshia senotsü meshiba 13; temolung magütsüba ajanga nisung südaktsüba 07; danga IPC 04; Arms Act-15; NDPS Act- 23; NLTP Act- 35; NSR 62- 04; Other special law- 02; Suicide; UD Cases- 11 lir, ta ashi.

Department of Fisheries & Aquatic Resources ajanga Amur carp lemstsü



Kohima, Luroi/August 09 (TYO): ICAR- Central Institute of Freshwater Aquaculture (ICAR-CIFA), Bhubaneswar, Odisha aser Department of Fisheries & Aquatic Resources lungjemer Kohima paddy cum fish farmers nem Bodhbarnü Amur carp seed (cyprinus carpio haematopterus) lema agüja liasü.

Kohima nung aliba Department of Fisheries & Aquatic Resources indang Directorate conference hall nung iba metsü lemstsüba sentong

tatsüka agidang Deputy Director, Dr. Vimezo Kire-i Amur carps indang tongmelang agi rateta ashidang iba ango ya tziü tatsü, temperature melentepa alidak, high turbidity nung liteter aser mapang tatsüka tsüngta ayoktsüsa iner alir, ta ashi.

Pai district nung aluyimer tem dang technology tasentem amshia ango timba metsütsü ajungshia liasü.

Department tenung nung pai Dr. P.K Sahoo, Director ICAR-CIFA; Dr. S. Adhikar, Principal

Scientist and Co-Chairman of NEH, ICAR-CIFA aser Dr. R.N Mandal, Principal Scientist and Principal Investigator of the project ICAR-CIFA, Bhubaneswar, Odisha nung dang pelaba lemsatepa liasü.

Kasa anogo Fisheries & Aquatic Resources nung "Paddy Cum Fish Culture" indang State Level training ka agüja liasü, kong shisalen sayur ya Bhubaneswar, Odisha ICAR-CIFA nungi Principal Scientists Dr. R.N Mandal aser Dr. S. Adhikar liasü.

DC Kohima ajanga National Flags agizüksü metetdaksü

Dimapur, Luroi/August 09 (TYO): "Meri Maati Mera Desh" aser "Har Ghar Tiranga" campaign dak sendakba nung Deputy Commissioner Kohima, Shanavas C IAS ajanga district kübok aliba

Offices (HoOs), NGOs aser danga telok ajak dang Development Branch, Office of the Deputy Commissioner Kohima nungi August 11 aser 12, 2023 anogotem anepdang 11:00 ako nungi tenzüka National Flag agizüksü metetdaksüogo.

Kohima Press Club tongti zülur atema election agitsü

Dimapur, Luroi/August 09 (TYO): Kohima Press Club (KPC) ketdangpur 2022-25 kümsük tanungba mapang tongti zülur inyaksü asoshi KPC constitution indang Article VIII (3) agi melaba ama election agitsü, ta KPC Election Commission sangdong ka ajanga ashi.

Candidate temi August 14 nungi 20, 2023 tsüngta anepdang 10:00 ako nungi nikongdang 5:00 ako mapang commission züngsem mashi ka sangdong ajanga ashi. Scrutiny of documents ya August 21 nü


agitsü aser withdrawal of candidature asoshi August 22 ya tatem asütsü.

Election ya August 23 nü nikongdang 1:00 nungi 3:00 ako tsüngta agitsü aser iba indang osang kasa anogosa agütsütsü.

Mepaitoktetba tensa kar ajurura Election Commission ajanga election anogo melenshütsü.

KPC General Secretary menden nungi Atono Tsükrü Kense anenba sülen iba by-election ya agitsüsa akumer. La menden nungi aluba ya July 27, 2023 nü lokti senden nung agizüka liasü.

Pastor Noksang-i atenba kensep "Jesus Knows" album saya



Pastor Noksang-i (tiyong) atenba kensep "Jesus Knows" album sayar kelen Wb Lima Lemtur, Proprietor (achichi) aser Rev. Achet Pongen (abelen) par asem tangokba noksa.

Mokokchung, Luroi/August 09 (TYO): Grace Church Yimyu Mokokchung nung Pastor Noksang, pai atenba kensep "Jesus Knows" ta asüba Music Vedio & Audio Album Rev. Achet. Pongen IEF-i meshiteta sarasademsü kelen Wb Lima Lemtur, Proprietor and Project Director Soundwave

Studio Mokokchung ajanga sayatsüogo.

Iba kensep adokba ajanga nüburtem dang Tsüngrem kuli süner aser nüburtemi iba ken angadang parnok takum nung temelenshi kadaktsütsü tangatetba nung iba kensep ya adokerta Pastor Noksang-i kensep sayaba mapang nung ashi.

State nung private school temi küm nung sen crore aazüker: Advisor Yhome

Dimapur, Luroi/August 09 (TYO): Advisor, School Education & SCERT Dr, Kekhrielhoulie Yhome-i August 9, 2023 nü SDEO Office, Niuland semdang aser Deputy Commissioner, Niuland indang Conference Hall nung district administration aser Education ketdangsurtem den senden ka mena liasü.

Ketdangsurtem den jembidang Yhome-i ashiba agi, Nagaland nung private school temi küm shia sen crore aika aazüker. Anungji yimdkayimtsüng nung nüburtem takum aser rongsenketzung tajungba kumdaktsütsü mechi asenoki item private school nung azungba kaketshirtem government school tem nung aniokttsüla, ta pai ashi.

Training junga agia sen talang

agüjaka school-i government tesayurtem maruba ajanga kaketshir aika private school nung azungtsü molungteter, ta Yhome-i ashi.

Nagaland Education Project- The lighthouse (NECTA) kübok Teachers Attendance Monitoring System (TAMS) nung shilem ka ama authentication drive agiba nükjidong ya Department nung employment tejangja metettsü asoshi lir, anungjidang Department nung tesayurtem aser staff tem shidak lemsatetsü, ta ashi.

Deputy Commissioner, Niuland, Sara S Jamir; SDEO Niuland, Erali Swu aser danga ketdangsur temi Advisor dang district nung Education Department-i nungdakba shia liasü.



New Delhi, August 09, 2023: Bodhbarnü 'Quit India Movement Day' anogomong nung Parliament House kima BJP MP temi longkak aitba noksa nung angur.

Küm 22 tsüngda train lendong shilem 90 ajemogo: Arjun Munda

New Delhi, Luroi/August 09

(Agencies): Bodhbarnü Union Minister, Arjun Munda-i, linük nung tesüiba küm 22 tsüngda train lendong shilem 90 shi ajema kümogo; 2000-2001 küm train lendong 473 ataloka liasü saka 2022-23 nungbo train lendong 48 dang atalok, ta metetdaksü.

Osangbenertem den jembidang Munda-i, 2004 nungi 2014 küm tashi nung küm shia train lendong alatokba average ji 171 liasü, ajisüaka 2014 küm nungi 2023 küm tashi nung küm shia train lendong atalokba average ji 71 dang aküm, ta metetdaksü.

"Testüiba küm 20 ji asadangra tangbo train lendong kanga ajema kümogo. 2000-2001 küm train lendong 473 ataloka liasü saka 2022-23 nungbo train lendong 48 dang atalok," ta pai ashi.

Train operations safety atema Railways-i kanga tongtibang mera aika agia inyaker; item rongnung 2017-18 küm Rashtriya Rail Sanraksha Kosh (RSK) tenzükba aser lendong nungi kümzüksü atema kanga tongtibang osettem melentsü aser tajungba kuma yanglutsü atema fund ka tenzükba densema lir, ta pai

metetdaksü.

Railway station 6,427 nung electrical & electronic interlocking systems lir, aser ibaji ajanga meimchiri aibelenba ajanga lendong ataloktsü aliba nokdang, ta pai ashi.

Iba dak alia tesem 11,093 nung level crossing gates interlocking lir aser station 6,377 nung track circuiting renemogo, ta minister-i metetdaksü.

Indian railways-i mepet-tzüsü ajanga timtem agütsüba mapang amshitsü atema loco pilots asoshi GPS-based fog safety devices agütsür, koba ajanga loco-pilots-i tesem balala jelia meteter, ta paisa shisem.

'Bharat Jodo Yatra' tanabuba Gujarat nungi Meghalaya tashi agitsü

Mumbai, August 09 (Agencies): Maharashtra Congress Tir Nana Patole-i, Rahul Gandhi indang 'Bharat Jodo Yatra' Kanyakumari nungi Kashmir tashi takok ngua agiogo aser maneni Bharat Jodo Yatra tanabuba shilemji Gujarat nungi Meghalaya tashi agitsü sentong renemogo, ta metetdaksü.

Paisa, kasa mapang nungji Maharashtra nunga Congress lenirtemi state nung iba sentong nung shilem agitsü, ta metetdaksü.

Anogo ishika tejaklen Gujarat Congress-i Rahul Gandhi dang Bharat Jodo Yatra tanabuba shilemji par state nungi tenzüksü jaoka liasü.

Bharat Jodo Yatra mezüngbuba shilem yaküm September ita nung Tamil Nadu

kübok Kanyakumari nungi tenzük aser taküm January 30 nü Jammu & Kashmir yimtiba, Srinagar nung tembanga liasü. Iba yatra ajanga state 12 aser Union Territories ana ayimjema liasü.

Mezüngbuba Yatra Kanyakumari nungi Kashmir tashi agi aser anogo 150 tsüngda Rahul Gandhi leniba nung party lenirtemi kilometer 3,500 tetsüng agi jaja shilem agia liasü.

Gandhi leniba nung Congress lenirtem aser züngsemtemi shilem ana lemsar anogo shia anepdang 7:00 ako nungi nikongdang 6:30 ako tashi jaja. Rahul Gandhi bo Kanyakumari nungi Kashmir tashi jajaa liasü. Pa shipping container cabin ka nungsa anisüngzüka liasü; iba cabin nungji yipten ka, metsümeshidak aser AC liasü.



August 09, 2023 nü Ranchi nung International Day of World's Indigenous Peoples anogomong sentong nung tribal nisungtemi shilem agiba noksa nung angur.

Bihar sorkari Bihar Museum aser Patna Museum na sendaktepa tunnel ka atutsü atema sen crore 542 sanction süogo

New Delhi, Luroi/August 9

(Agencies): Bihar Museum aser Patna Museum na sendakteptsü atema 'world-class heritage tunnel' ka yanglutsü atema Bihar sorkari Mongolbarnü sen crore 542 sanction süogo.

Iba telemtetba ya Chief Minister Nitish Kumar lenisüba nung Mongolbarnü cabinet senden ka amenba mapang agia liasü. Iba onük ya state Urban Development and Housing Department-i cabinet matsüngdang benoka liasü.

Osangbenertem den sensaksema mapang Additional Chief Secretary (Cabinet Secretariat), S Siddhartha-i ashiba agi, "Bihar Museum aser Patna Museum na sendaktepa 1.5 km talang tunnel ka yanglutsü atema Delhi Metro Rail Corporation (DMRC) nem nonglokjatokogo. Cabinet-i Mongolbarnü iba project atema sen crore 542 intoktsü asoshi budget yanglushiba agizükogo."

Iba tunnel yagi Bihar Museum (Bailey Road) aser Patna Museum (Chajju Bagh) na sendakteptsü, ta pai ashiba den iba project ya 2026 küm

tashi nungbo tembängtsü.

Kasa mapang nung Bihar Chief Minister Nitish Kumar shibai Hombarnü Bihar Museum Biennale-2023 lapokja liasü pai, "state sorkari Bihar Museum aser Patna Museum na sendakteptsü atema ali telung nung km 1.5 talang tunnel ka yanglutsü atema inyaktepdar. Iba mapa ya tembanga inyakba sülen tesemdangertemi ticket ka dang alir iba tunnel ajanga museum anaprongla semdangtettsü," ta ashi

"Tunnel nung air-condition inoktsütsü aser tunnel

tatembang anaprongla nung apu alitsü. Apu aser pedestrian passage ya tetsüng agi jajatsü mulunga alirtem atema asütsü. Maneni senzusenpongtsü atema battery agi inyaksangshiba golf car tem agütsütsü," ta Bihar sorkar ketdangsur tejen kati ashi.

Maneni tesemdangertem tekümzükba kübok toktsütsü atema mi lendong amala nungi jenbotsü asoshi aser lendong atalokba mapang kecha tetsükdaksü makai iba tesem toktsür jena otettsü atema facility teperi toktsütsü, ta paisa shisem.

कर्मचारी राज्य बीमा निगम
(श्रम एवं रोजगार मंत्रालय भारत सरकार)
EMPLOYEES' STATE INSURANCE CORPORATION
(Ministry of Labour & Employment, Govt. of India)

क. ए. बी. नि. एस. आई. सी.

क्षेत्रीय कार्यालय, पूर्वांचल क्षेत्र
REGIONAL OFFICE, N. E. REGION
बामुनीमैदान, गुवाहाटी-781021
BAMUNIMAIDAM, GUWAHATI-781021
वेबसाइट/ Website: www.esic.nic.in
Email: smo-ner@esic.nic.in

उत्तर पूर्व क्षेत्र में ईएसआई निगम के लाभार्थियों को बांझपन उपचार के लिए आईवीएफ प्रक्रिया प्रदान करने के लिए अस्पतालों, स्वास्थ्य देखभाल संगठनों (एचसीओ) के पैनल में शामिल होने के लिए रुचि की अभिव्यक्ति (ईओआई) आमंत्रित करने की सूचना।

North East Region nung ESI Corporation nungi beneficiaries atema infertility treatment asoshi IVF procedure agitsütsü atema Hospitals/ Health Care Organisations (HCOs) Empanelment asoshi Expression of Interest (EOI) notice agütsür.

CGHS rates (parnok indang website nung aliba ama) cashless basis nung, ESI Corporation nungi beneficiaries atema infertility treatment asoshi IVF procedure agitsütsü atema North East Region nung aliba Government / Semi Government / CGHS panel / Private Hospitals dang nungi Regional Director, ESIC NER-i Expression of Interest (EOI) meshir.

Tejangraba lira osang tejangja metettsü atema nenoki www.esic.gov.in/tenders Console No.10523/2023 mesüra www.eprocure.gov.in/eprocure/app Tender ID: 2023_ESIC_764439_1 nung reprangtsü akok.

Online ajanga EOI (Online) terenemjem agütsütsü atema tatembangbuba anogo aser mapangji: 16-08-2023 nikongdang 05:00 ako tashi asütsü.

क्षेत्रीय निदेशक(प्रभारी)
ईएसआईसी, क्षेत्रीय कार्यालय, गुवाहाटी
Regional Director (I/c)
ESIC, RO, Guwahati

CBC 23123/12/0002/2324

बैंक ऑफ बड़ोदा
Bank of Baroda

CIRCULAR ROAD BRANCH
Ground Floor, Faith Building, Near Khermahal Traffic Point,
Dimapur, Nagaland- 797112, Email: vjdimab@bankofbaroda.co.in

**SALE NOTICE FOR SALE OF
IMMOVABLE PROPERTIES**
APPENDIX- IV-A [See proviso to Rule 6 (2) & 8 (6)]

Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice.

Public aser talisa sen apur (tem) aser Guarantor (tem) dang, tsünglanglen shia aliba kiojen, koba Secured Creditor, **Bank of Baroda, Circular Road Branch, Dimapur, Nagaland** dang mortgaged/charged süa liasü, ibaji Authorised Officer of **Bank of Baroda, Circular Road Branch, Dimapur, Nagaland**, Secured Creditor-i agiadokogo aser tsünglanglen shia aliba senotsü alanzüksü atema iba kiojenji "Kong koma ali", "Koma lidir yamaji" aser "Yangji aliba ajak" ayoktsü. Sen apur/tem / Guarantor/tem / Secured Asset/tem / sentsüh / Reserve Price / e-Auction anogo aser mapang, EMD aser Bid Increase asüba senji tsünglanglen shia lir:-

Status of Possession: Physical
Property Inspection anogo aser mapang: 22.08.2023 & 10:30 AM nungi 4:00 PM
Sentsüh ajak agi: 29.12.2021 anogo tashi nung Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only), iba dak alia sen tetemlok aser tanga charges adentsü.

Sl. No.	Name & address of Borrower/s / Gurantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1.	MR. CHINNY MAGH (BORROWER) House No.208, Industrial Village, Razhuphe, Dimapur, Nagaland State- 797112.	A land measuring 08-1K-18L and building thereon situated at Padumpukhuri, Dimapur covered by Patta No.1202, Dag No.295/1671 standing in the name of Shri Chinny Magh, S/o Late Ashiwa Magh. Bounded by:- North: Plot of Lanu Ao, South: Approach Road, East: Plot of N. Konyak, West: Plot of Bohovi Awomi.	25.08.2023 1:00 pm to 3:00 pm	Rs. 65,05,200.00
2.	MRS. NAOMI MAGH (CO-BORROWER) House No.208, Industrial Village, Razhuphe, Dimapur, Nagaland State- 797112.			Rs. 6,50,520.00
3.	MR. SENILO MAGH (GUARANTOR) S/o Chinny Magh, H/No. 208, Industrial Village, Dimapur- 797112, Nagaland.			Rs. 50,000.00

Telatelbatem aser osang tejangja agüja aliba link nung angutsü <https://www.bankofbaroda.in/e-auction.htm> and <https://ibapi.in>
Date: 10.08.2023
Place: Dimapur

Authorised Officer
Bank of Baroda, Circular Road Branch



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI(AUGUST) 10, 2023

Alima lisopur anogo aser temeten

1 994 kum December 23 nu United Nations lokti senden nung lemtetba ama 1995 kum nungibo kum shia August 9 ya Alima Lisopur Anogo, International Day of World's Indigenous People, monga arur. Atangji, iba anogomung mamongdanga UN lokti sendenisa lemteter 1993 kumbo alima ajunga atema lisopur kum asutsu ta ser 'International Year of the World's Indigenous People' mungogo. Iba kum nungi tenzucker, ano kum terbo lisopur kumsa asutsu ta ser UN-isa 1995 kum nungi 2004 tashi "International Decade of the World's Indigenous Peoples" munga aruogo. Atangji, alima nung lisopur, Indigenous people, nütüng yongsük ya noklang nung shilem pungo (5%) dang lir, saka ano alima nung kanga sensakertem rongnungbo lisopurtem ya noklang nung shilem 15 lir ta asadangteter. Item rongnungji asenok Naga nungertema dena lir. Ashiko, asenok ya lisopurtem masu asubo asenoki anir nütüng teimba, kin tuluba aser takarba purtemi alima nung nütüng yongsük noklang nung shilem pungo purtem temetenji wazuka yuja ajungkettsüsbajibo yutsur ajemokang yutsula. Ajisüaka, asenok ama yimkümer aser ali kiburbo ali kibur saka nütüng agi tangar madoksa aser rongsen aser tashitemetet agi tangar memenepi aliba purtem timtemba aser kin tulutemi mezügmeshiba reprangteta alima nung telok tuluba, takarba aser temetetertemi lisopurtem temeten wazuka yutsutsu asoshi mulungtetba ya alima nung yimten yimsüsürtemi inyakba temeim aser tangatet mapa tajung rongnung ka asutsu. Ajisüaka, asenokiang iba UN telemtetba maongka aser tajangzükji magitetter. Ibayongji, asenoki yashia iba anogomungbo memetetka süitemdaktsüogo. Atangji, UN- i ayongzuka amungba Alima Lisopur Anogo ya tachitajemtsü mesüra tagitarutsu alemba anogo ka masu mesüra subsidy angutsüba sentong kata masu. Iba anogomung nung yabo shingaia asenok nem sempet magÜtsutsu mesüra shingaia iba sentong ayongzuka memongtsutsu saka asenoki iba anogomung amungba nung tagitsü aser temoatsü keta aliba reprangteta asenoksasa asenoki bilemteta amongtsüla. Atangji alima nung lisopurtem nütüng ya kanga ishika saka ano oshi aser sobaliba nungbo parnoksa teimba aser takarba, kechiyong alima nung alir nisungtemi jembiba oshi meyirijang tenet shi rongnung lisopurtemi jembiba oshi teimba lir aser parnok kentenmenü, yar tsüngsang aser sübosülemtsü nung kanga takar. Aji oda, kum shia August 09 nu Lisopur Anogomung amungba nukjidongji item oshi aser sobalibatemi alijak nungi mesamadaktsü wazuka yudaktsüner. Ano, alima nung lisopurtem asoshi item dang nungi tongtibangtiba kaji, yimten nung tangar bendanger kin tulu purtem nem mamokbangdaktsüi pei mulungba nung pei yimten temeten wazuka ayutsübaji dang masu saka pei lima, pei nübor aser pei sobaliba dak apet peisasa pei mulungba temzüng ozüng yanglua pei yimten yimli meraketa yangertsüba temeten aser mapatemji lir. Ibaji angatetdaktsü atema takum 2023 kum Alima Lisopur Anogomung atema shimtetba omenji " Pei mulungba nung litettsüsa temelenshi bener arutsur Liso lanurtem" ta shimteta amunger. Iba omenji tangar lisopurtem dang nungi asenok Naga nung lanurtem daksa tapetba, kechiyong asenok ya alima nung asen mulungba nung masu saka tangar kin mulungba nung latetba temzüng ozüng nung alirtem lir. Iba jagi yashiang India tatar senden nung asenok dang masüngdangi oagi bendanger kintem den artsüsa aliba asen li aser arembo government-i agiadoktsü ozüng latetogo. Aji oda, tangar temzüng ozüng kübok alir asünungji maparen aika nung asenoksasa telemtetba magiteter aser tangar nüken tsübuu dang alir. Iba jagi yimten telok ka nunga ajangajanga melitetter aser iba jagi asenok mera maket akümer. Iba amaji lisopur takum nung mataloktsü asoshi Alima Lisopurtem Anogomung nung ya lisopurtemi pei lipok, pei temeten, pei sobaliba aser pei otsü jembia amungtsübaji kanga tongtibang lir. Alima nung nisunger temeten aser sobaliba ya o dang lir, anungji jembia alitsüla, mejembira oshi dang masu sobaliba aser temeten ajunga samatsü aser ali kibur agi kilir akümtsü.

OLEMSABANG

LANUR SHIA KHRISTA KULISÜR KA-KA

~ Imtiwapang, Source: Mitsa

Kodang kulisüba ta südir ya Tsüngremi tamanger shia nem nungloktsüba mapa lir. Kulisüba ranglokji, "Yisu Khrista" aser aji 'Yisu Khrista dang tekümet asoshi chichiba aser atangji lenmang aser Kulisütsü asoshi tashiji 'Tanela Temeshi' ta angatetsüla. Khrista tashi ajanga dang meimchir takum ka melenshitsür aser Khrista akaba takümüji ajak asoshi 'Kuli' ji lir.

Tanü asen lima yimjung, ochi aser tesünep agi tzüraseta alidang Khristan lanur tajung ka dak nungi tzüratema ajemtsü tzüpokdakji adokdaktsütsüla. Kechiba Khristan lanurtemji alima asoshi tatishitsü lanur ta jembir süra, Khristan lanur shiaji alima dang Khrista asoshi kulisür ka- ka lir. Pa maru tashi alima nung Khrista kuli asütsü nungloktsür ao.

Kulisür ka asütsü asoshi lanur shia dak item nükmen ya alitsüla; Ochi, Temeim aser Aria bilemba. Shi nung aser Shisatsü nung aintsüla, item ajak nung nung, Tanela liromedema ainba ajanga lanur takum ka ji tetemjen Khrista kulisür tajung ka kümtet, Pei-i kechi atema kuli agütsür iba indang tejangja metetba, pei takum nung tejangja metetta ajangshiba, temulung lemtetba aser bendanga agütsüba tamang. Kulisür ka dak iba jakla mali tashi pa/lai kuli asübaji amajok mapa ka dang asütsü. Yisuji temeshi anungji Pa chirtema tarak maket temeshi lidaktsüner. Tetezü, Pa chirtemji alima nung Yisu noksa aser Pa kulisür ka-ka lir anungji Pa chir shiai meshiteta pa mesükba nung aintsüla. Bendanga agütsüba ka mali tashi; tangatetba ka maru tashi Khristan takum ka ama kulisütsüji tamakoktsü. Aser asen libaliruba nung tangari asen dak Khristaji mongora, Kulisübaji teraksa. Lanur tajung/ nisung tajung, ta asüba mesüng jagi; Arogo nung züngsem tajung ka ta asüba mesüngjagi na kulisür tajung ka ta meshitet. Saka, tensa - tia ajak nung, nübur ajak den, liromedema litetba aser libaliru ajak nung meshiteta ajemalua taremsük nung bendanga agüja tilatiba kümer kar danga kümzükra, tajangzük ngura ta sür kulisüba nung shilem agira iba süngjang tajung atangtsü.

Asen kulisüba ajanga külem medemer, kibong, Office nung, kiyong-kinartem, Tsüngrem tekümzükba taochi dangi arutsü lenmang sadema lapokja, iba maongka tajung asen ajanga angutsüsa kuli süteter-mesüteter? Asü tamang tia lenji dang mera taliba agitsüsa libaliruteter? Asen Takum aser inyakba yimya balala agi, aseni tenzükba Tsüngremji aser meimba Khristaji tangaria angutsüsa lidi aser ngutettsüsa inyakdi ta ni asenok ayongzükner.

Kulisüba nung shilem agitsü asoshi kija takum shia teinyaktsü aser tangatetsü kar lir. Asenoki Pei sasa naji shiba - ni shiba ta angatetdi. Na kechi maka aji nai tangar nem magütsütettsü. Tsüngremi nisung shia nem tejangraba balala, sempet balala agüja lir. Itemji nai koma amshir. Aser item ajanga tamanger tajung ka ama koda kuli asür.

Na anepaluba (Hospitality) nung junger asütsü, Tesayuba nung tajung alitsü ano tali involve süang. Earning tajung alitsü akok, karbo dangang tenzük asütsü akok, agütsütsü bilema lira odang nunnganga meli agüjang. Mapang aser tashi agüja nai ajuruba nisungtem, ne den aliba, nai jangjaba nisungtem ano tali metettsü merangang. Parnoki aginüba maginüba tem meteta libaliru-ang, ibaji ajanga temeim ulutsü.

Kulisüba yimyaji balala asütsü akok, saka koba yimya nung südir süang pei tamang aser tashi yari inyakba ajakji Tsüngrem tsüngdang senti lir. Anungji arungma, Tsüngrem nungi mangdang, shisatsü aser tashi meshidi asen tetemjen Khristan Lanur ka ama asen takum, sempet, mapang, rongsen aser ochi tanela agi Khrista kulisür ka-ka südi.

Tsüngremi mojang!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

China nung ketdangsertemi asentenshir Kangki agientsütsü



Tamalen China kübok Dingqiao jila nung sorkar ketdangsertemi Protestant Tenla ki ka nungi Kangki agientsüba mapang tangokba noksa nung angur.

August 09, 2023: Anüdoklen China kübok Zhejiang province nung sorkari ano asentenshir Kangki agientsütsü mesüra raksatsütsü sentong yangluba atema Khristantemi mepelaba metetdaksüogo.

Zhejiang province nung Protestant Khristan million 2 lir aser Catholic Khristan 200,000 shi lir; 2014 küm nung tenzüka iba province nung Kangki noklang aika raksatsüogo.

Tang tesüsa (August 3, 2023) sorkar ketdangsertemi Zhejiang nung aliba Dongqiao Christian Church dang, Tenla kidang aliba Kangkiji agientsütsü, ta metetdaksüogo.

Sorkar aija Arogo nung pastor kati, sorkari iba telemtetba agibaji ajanga China nung loktiliba nung tesünap raksatsü, ta ashi.

"Ano asentenshir Kangki aika raksatsütsü akok," ta pastor-i ChinaAid nem metetdaksü.

Sorkari Arogo nem iba osang metetdaksüba sülen

Arogoi Khristantem dang maneni sarasadema alitsü mepishiogo.

Pastor-i ashiba agi, taoba ita Shanxi Town, Yongjia County aser Lucheng District nunga sorkar ketdangsertemi Arogotem dang public tesemtem nung yua aliba Khristan otem ajak indokang, ta tuyua liasü.

Ketdangsertemi Tenla ki jaratem nung yongmen-in nung zülua aliba "Emmanuel," "Jesus," "Christ," aser "Jehovah" ta zülua aliba ajak agienadokogo.

2014 nungi 2016 küm tashi nung Zhejiang nung sorkar ketdangsertemi Tenla ki 1,500 dak tema nung Kangkitem indoktsüogo, ta melungtet telok ChinaAid-i metetdaksü.

2014 küm April 28 nü Wenzhou yimti nung sorkar ketdangsertemi Sanjiang Arogo Tenla kidang aliba Kangki indokja liasü. Khristan nütsüng aika aliba agi Wenzhou yimti dang ya "Anüdoklen aliba Yirusalem' ta ajar.

2013 küm mezüng Chinese Communist Party (CCP)-i Tenla kitem nungi Kangki indokja liasü, iba sülen nungjagi tanga province tem nunga Kangki indoktsür.

2018 küm Henan province nunga Kangki aika raksaja/indokja liasü. Henan province nungsa Laishiba aika rondoktsü aser Khristantem kidang zülua aliba Lai otem agienja liasü.

Osang angazükba agi, United Front Work Department senden amenba mapang nung Tenla kitem nungi Kangki agientsütsü atema China Tir Xi Jinping-i temelaba agüja liasü.

CCP lenirtemi ashiba agi, lokti aliba tesemtem nung Khristantem temaitsütem aser ozülü ayubaji yimsü dak sendakba inyakyim ajanga memelar.

Tang alima nung Khristantem alitsü atema linük tamajungtiba 50 nungi China ya jenjang 16buba nung lir (Open Doors).

Arogoi Myanmar linük nung tzümetsüng agi kongshirtem yarir

August 09, 2023: Tawa Myanmar nung tzünglu maneni aruba ajanga tzümetsüng agi internally displaced people (IDPs) aika mejungi kongshiogo, ta Arogo osang ka ajanga metetdaksü.

Tzümetsüng ajanga Chin State kübok Paletwa jila aser Rakhine state nung IDPs camp aika raksatsüogo, ta Arogo lenirtemi metetdaksü.

Khristan charity- Karuna Pyay nung Director, Nereus Tun Min-i, "Paletwa jila nung ki aika raksaba osang onoki angashiogo aser maneni Rakhine state nung tzümetsüng agi kongshirtem dang nungi osang metetpeladar," ta metetdaksü.

Taküm May ita nunga Cyclone Mocha agi Paletwa jila kongshia liasü. 2018 küm Myanmar nung sepaitem aser

Arakan Army tsüngda rara tenzüka sülen nungi tenzüka nisung 500 shi camp pongu nung jenoka lir, aser camp kabo St. Peter Catholic Tenla ki moapu nung lir.

August 08 2023 nü osangbener den jembidang Tun Min-i, "Tzümetsüng agi raksatsüba ki yanglushitsü atema onoki senotsü teyari agütsütsü," ta metetdaksü.

Paletwa jila nung aliba Arogo nung inyaker, Mg Aye-i, "Tang tashi tzünglu maneni arur, ibayongji onoki kanga nemzüka aliba tesemtem nung alirtem aser ayong anasa alirtem atema shisabulua bilemstür," ta metetdaksü.

Taoba hopta nungi tenzüka southern Myanmar nung tzünglu maneni aruba ajanga tzümetsüng den külemi

anentsüh lendong ataloker aser gari lenmang aika raksago.

Tzümetsüng aliba tesemtem nungi nisung 10,000 shi aniteta Mon state aser Karen state na nung jenokdaksüogo.

Rakhine state kübok Kyauktaw jila nung aliba Arogo nung inyaker, Kyaw Lin-i, "Taoba hopta nungi tenzüka tzünglu maneni aruba ajanga ali nemzüka aliba tesemtem nung tzü agi ki aika metsüngbangogo. Rakhine state nung alirtem atema timtem maneni bendenloker, kechiyong taküm cyclone Mocha ajanga-a iba tesem kongshia liasü," ta metetdaksü.

Department of Meteorology & Hydrology-i August 10 tashi tzünglu maneni arutsü, ta tekümdangtsü osang metetdakja lir.

ANO GO ABEN TSÜNGREM DEN

Tabensa Kaket Ka T.Ken 119:121-128

Tanü kaket zülur aika akümer. Kari kaket aika zülur, kari ishika dang zülur. Kari kaket tulu zülur, kari tila zülur saka shingaia pei züluba kaketji tabensa ta mashir. Kaket ka dang tabensa kaket lir aser ibaji Tsüngrem O. Iba yongji ken züluri ya zülü, "Aji asünung kechisarena nung ne temelaba ozüng ajak shitak ta ni züngshir; aser tiyazü lemanj ajak ni sempar" (t.128). Laishiba ajungaji apuoktsüba O lir. Iba tetezü Tsüngremi apuoktsü. "Laishiba ajungaji Tsüngremi apuoktsü, aser tajangzük lir" (2Timo.3:16). Apuoktsübaji sayatenya ka lir. Tsüngrem tanela ajanga Mosa, Isaia, Mathi, Mark, Paul aser tangar den jemi aser ajaki zülü. Aji saka ibaji Tsüngrem O lir.

Tsüngrem O nung aibelen mali ta bilemtetang. Ibai ajak ochi. Laishiba ashiba otsüji shitak. Lai ashiba shin o ji shitak. Science indang iba yagi kechi ashir aji shitak. Nisung shisatsü agi asenoki Laishiba tendangtsü makok. Asenoki nisung shisatsü Laishiba ajanga tendangtsü akok. Iba tetezü asenoki Laishiba O agi taküm alir. Yisui ashi, "Asenoki Tsüngrem bang nung agi adokba O shia agi taküm alitsü" (Mathi4:4). O shia nai Tsüngrem O ajungaji mezüngra kechi sentoker? Kechiaser Laishibaji apuoktsüba O aser atangji asenoki iba dangi or ashitsü akok, "Kibuba, ni kechi inyaksü?" Pai asenok dang langzüksü.

Laishibaji sayatenya kaket ka lir kechiaser ibai Tsüngremi apuoktsü. Iba shisatsü aser ochi ajanga taküm liang. Kodang nai ibai agizükdir aser tashi angadir, iba yagi na sayatenya taküm ka dangi anitsü.

Pastor Noksang-i atenba kensep "Jesus Knows" saya



Pastor Noksang-i (tiyong) atenba kensep "Jesus Knows" sayadang tangokba noksa nung angur. Kasa noksa nung Wb. Lima Lemtur, Proprietor (achichi) aser Rev. Achet Pongen (abelen) nata angur.

Mokokchung, Luroi/August 08 (TYO): August 08, 2023 nü Mokochung ajanga iba kensep sayatsüogo.

Iba sentong nung jembidang pastor Noksang-i, kensep adokba ajanga nüburtem dang Tsüngrem kuli süner aser nüburtemi iba ken angadang parnok takum nung temelenshi kadaktsütsü tangatetba nung iba kensep ya adok, ta lemsatepa liasü.

Director Soundwave Studio Mokochung nung Pastor Noksang-i atenba kensep "Jesus Knows" ta asüba Music Video & Audio Album Rev. Achet Pongen IEF-i meshiteta sarasademtsüba sülen Wb Lima Lemtur, Proprietor & Project

**AO OSHI ANGAZÜKDAK:
TANÜ ANGAZÜKTSÜBA OJANG**



Rongnir

(n) rong anisang (captain of a ship)

* **Rongnir** asoshi tzüymji par yimtsung ama akümer.

Rongnü

(n) shiruru tezung merema sor nailoka yangluba nü (decorative spear)

* **Rongnü** ya yartsungsang nung amshir.

OLONG PAITEP # 6602

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzung tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizingdak - (3)
- 14. Tebang nungi adokba - (3)
- 16. Sungdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzuba - (5)

OLONG PAITEP # 6601 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sunglang.

LANGTSÜNGLEN :

- 1. Yiptem, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

NAI-A YA METETTER MA



Alima nung asemben tashi heart bypass agir (tebur) arishi talangtiba alibaji United Kingdom (UK) nung arishi kum 77 tain Colin Hancock lir. August 4, 2023 nü pai iba operation agir kum 45 aser anogo 361 junga otsü tasen yanglutetogo ta Guinness World Records ajanga ashir. Taoba nung USA nungi Delbert Dale McBee-i kasa operation agir arishi talangtiba aliba otsü yangluteta liasü saka pa 2015 kum arishi kum 90 lia asü.

Meghalaya sorkari Mukroh lendong atema meyariteper

Guwahati, August 9, 2023

(Agencies): Meghalaya sorkari Mukroh lendong atema kulisertem aser kulikakettem kecha magütsü ta Assam inquiry commission-i metetdaksü.

Rumi Kumari Phukan (retd)-i aniba commissioni-i Assam House nung proceedings agidang nisung shinga maruba agi iba maparen tembangogo.

"Commission-i Meghalaya

nung proceeding (hearing) tembangogo aser Guwahati-i meyipa aruogo. Nisung shinga maru aser sorkar ketdangsürtemia Commission tsüdangi marui" ta ketdangsür kati ashi.

Commission-i kulikakettem aser kulitem bendentsü atema aru. Iba osang state sorkar nem-a agütsü aser kulisürtem anir arutsü mepishi, ta pai ashi.

West Khasi Jaintia Hills district deputy commissioner dang kulisürtemi commission tsügangi arutsü atema ashi saka parnok nungi osang kecha mali, ta ketdangsürisa shisem.

Yakum November 22 nü Mukroh nung arrtsü mangatettep ken o atema raratepdang Mukroh nungi nisung pungu aser Assam forest guard ka asü.

Sikkim election nung BJP-i menden ajak nung tokteptsü

Gangtok, August 9, 2023

(Agencies): Bharatiya Janata Party (BJP) Sikkim unit ajanga state Assembly election nung candidate 32 toktepdaksütsü.

"Onoki constituency 32 prong nung candidate yoktsü aser onoki tesentaktep kecha makai takok angutsü" ta BJP Sikkim Spokesperson Dr. Kamal Adhikari-i ashi.

BJP Sikkim nungi teshimtet telok kati Raj Bhavan nung Governor Laxman Prasad Acharya den ajurutepa Padam



Garung asüba ken o CBI nem bushisügangdang südaktsütsü ta takhangba agütsüogo.

"Nübertemi iba ken o CBI

nem bushisügangdang südaktsünür anungji iba takhangba agizüktsü mepishir. CBI-i bushisügangdang asüba ajanga public-i bushisügangdangba maparen nung tamang mesamatsü" ta BJP Sikkim teloki Governor dang ashi.

"Onokisa nü dang kuli agötsü ajak kumzüka ayutsü aser talisa tetsür kaketshir asem nem security agütsütsü mepishir" ta parnoki Governor Acharya dang ashi.

**ALL INDIA INSTITUTE OF MEDICAL SCIENCES
NEW DELHI**

Nursing Officer Recruitment Common Eligibility Test (NORCET) 5

Notice No. 146/2023 Date: 05.08.2023

www.aiimsexams.ac.in



AIIMS New Delhi aser danga AIIMS nung tazung aliba den apet Level 07 in the Pay Matrix pre-revised Pay Band-2 of Rs.9300-34800 with Grade Pay of Rs.4600/-, Group-B nung Nursing Officer shimtsü asoshi Nursing Officer Recruitment Common Eligibility Test (NORCET) 5 atema Online Application meshir.

Online applications ya AIIMS indang web site www.aiimsexams.ac.in nung 05.08.2023 nunqi 25.08.2023 nikongdang 5:00 ako tashi agütsütetsü.

NORCET atema Eligibility Criteria yamai alitsü:

Essential Qualification

- I.
 - a. Indian Nursing Council/State Nursing council ajanga recognized süa aliba Institute mesüra University nungi B.Sc. (Hons.) Nursing / B.Sc. Nursing agir alir asütsüla MESÜRA Indian Nursing Council/State Nursing council ajanga recognized süa aliba Institute mesüra University nungi B.Sc. (Post-Certificate) / Post-Basic B.Sc. Nursing agir alir asütsüla.
 - b. State / Indian Nursing Council nung Nurses & Midwife ama register sür alir asütsüla

MESÜRA

- II.
 - a. Indian Nursing Council/State Nursing council ajanga recognized süa aliba Institute / Board mesüra Council nung Diploma in General Nursing Midwifery agir alitsü asütsüla.
 - b. State / Indian Nursing Council nung Nurses & Midwife ama register sür alir asütsüla.
 - c. AIIMS ajak atema temalen shia aliba educational qualification anguba sülen tajemba agia 50 bedded Hospitan nung kum ana bo inyakerdang alitsüla.
- Remarks** - Kum ana experience ya kanga tongtipang aser tejanga asütsüla, aser experience ya Essential Qualification anguba süle, i.e. residency period of the course renema, result sangdonger & State/Indian Nursing Council nung register sür sülen inyakba asütsüla.

Age Limit: AIIMS ajanga atema: Arishi kum 18-30 tsungta asütsüla. (As per detail on Age relaxation given in General Conditions subject to age Relaxation as per Recruitment rules of respective Institutes/Hospitals.)

Arishi kum ajak ya application form shibangba indang tatem anogo nung ajemdaker azungtsü.

APPLICATION FEES:

- A) General/OBC Candidates Rs.3000/- (Rupees Three Thousand only)
- B) SC/ST Candidates/EWS Rs.2400/- (Rupees Twenty-Four Hundred only)
- C) Persons with Disabilities Exempted
- * Candidate temi application fee ya DEBIT CARD/CREDIT CARD ajanga agütsütetsü. NETBANKING. Transaction / Processing fee, kar lira, candidate ajanga bank nem agütsütsüla.
- * Application fee khen agütsüba ya khenyongi meyipa mangutsü.
- * Shia aliba fee medeni Applications magizüktsü
- * SC/ST candidates tem Examination agütsür indang Application Fees ya results sangdongba sülen mapang shidak nung meyipa agütsütsü.

Online (CBT) for Stage I: NORCET Preliminary, Date: 17th September, 2023 (Sunday), Online (CBT) for Stage II: NORCET Mains, Date: 7th October, 2023 (Saturday)

Online ajanga apply asütsü aser osang tasentem metettsü atema AIIMS indang website www.aiimsexams.ac.in nung angutsü.

Ex-PM Imran Khan mendeni Pakistan election agitsü akok

Islamabad, Luroi/August 09

(Agencies): Taoba ato kilonser Imran Khan medeni national election agitsü renemshia Pakistan indang parliament shibangtsü. Khan ya tepuokdak lir aser küm pongu politics nung shilem magitsü tenokdangba agüja lir.

Khan melensang Ato Kilonser Shehbaz Sharif-i Tir Arif Alvi dang parliament house indang lower house, National Assembly shibangtsü atema Bodhbarnü zülua liasü.

Parliament shibangba ajanga Khan ato kilonser sür tenzükba küm pongu kümsük tembanger.

Parliament nung no-confidence vote nung Khan-i tamakok ajuruba sülen Sharif ya April 2022 nung ato kilonser akum aser Mongulbarnü pai ashiba agi, kümsük atemtsü anogo asem lia assembly shibangtsü Tir Alvi dang

asingdangogo.

"Asüng (Bodhbarnü) ozü sorkar kümsük tembanger aser constitution inyakyim ajak shidak inyakba sülen interim set-up nem yimten tashi agütsütsü," ta pai sentong ka nung ashi.

Assembly shibangba ajanga interim government-i anogo 90 tsüngta, tetetzü November ita tashinung general elections ketdang süa agitsü, saka iba interim government ya tang tashi mekumteti lir.

Pakistan indang constitution nung, anogo shidak nung legislative assembly shibangra anogo 60 tsüngta elections agitsüla aser jelia shibangra anogo 90 tsüngta agitsüla, ta shia lir.

Ajisüaka elections ya November nung agitsü teimla kangabo mesayur.

Pakistan nung digital census agiba taoba hopta sorkari

agizükogo, anungji lintük indang nütsüng yongsük million 241 akumer, koba 2017 census nung million 207 liasü.

Tesüsa agiba census nung ajemdaker constituency delimitations yangluba ama dang election agitsü, ta Pakistan ozüing agi ashir.

Constituency yanglushitsü atema ita pezü bosa agitsü, ta Election Commission of Pakistan ajanga ashir, anungji election mapang shidak nung agitsü teimla kangabo mangur.

Taküm election agitsü teimla kangabo mali, ta interior minister Rana Sanaullah-ia ashi.

Kasa mapang tang menden yutsüba sorkari interim cabinet aser caretaker prime minister meshimtetli lir.

Sharif-i caretaker lenirtem shimtsü asoshi par cabinet züngsem aser opposition leader Raja Riaz nunger Bodhbar aonung ajurutsü lir.

Ungma Tanujang Kin

TENÜNGSANG AGÜTSÜR

Mr. Akoknükshi Longkümer aser Mrs. Imsulemla Jamir na jabaso Dr. Supongmayang Longkümer, Pacific Theological College SUVA, Fiji nung Associate Professor jenjang ngutetba atema asen Tanujang kin-i pelaba lemsateper. Tsüngrem ne den teti liangma.

Kin tenüing nung,

1. Lanusüngküm Tatar

2. Rongsenpokba Tatar

Italy anasa rong ka raksaa migrants 41 asü



Rome, Luroi/August 09

(Agencies): Italy meyong Lampedusa asetkong anasa rong ka raksaa migrants 41 asü, ta iba lendong nungi takum jenbur temi ashi.

Iba lendong nung takum kumzükur nisung pezüi tekumzükur dang ashiba agi, parnok ya Tunisia nung aliba Sfax nungi Italy bushia rong ka nung arudang rong ya raksaa.

Takum kumzükur alir par pezü ya Ivory Coast aser Guinea nungi lir aser parnok Lampedusa ya Bodhbarnü atong.

Taküm North Africa nungi Europe bushia tzüyim ajanga arudang nisung 1,800 dak tema takum samaogo.

Takum kumzükur par pezü ya tebur asem aser tetsür ka lir aser parnok ashiba agi, tanur asem densema nisung 45 rong ka nung mena liasü.

Metre 7 (feet 20) shi talang rong ya taoba Bresthostibarnü Sfax nungi apuso saka tzüsem tuluka agi kongshiba sülen ghonda ishika tsüngta raksaa. Iba rong nung nisung 15 dang life vests agir liasü südi ta angateter.

Parnoki ashiba agi parnok ya khu abenba rong (cargo ship) kati kumzükur aser Italian coast guard indang rong ka nem agütsü.

Iiba tesem nung rong ana raksaa ta Italian coast guard temi Deobarnü ashi saka yangji iba rong ya dena ali-maliar mejangja.

Lampedusa nungi mile 80 shi pilar rongmendak Sfax yimti ya ajanga migrant tem Europe

nung takum tajungba alitsü bushia aor, ta Tunisian ketdangtsür temi ashir.

Anogo ishika tsüngta Italian patrol boats aser charity groups temi nisung 2,000 shi kumzükur lir, shirnok Lampedusa-i arua liasü.

Tawa Tunisia nung sentsü tanak Africa nung anema mapa tamajung inyakba tali kumogo aser parnok rong tala amshia linük yutsütsü merangba tali kumogo.

Central Mediterranean nung 2014 küm nungi tenzükur nisung 17,000 dak tema asüba aser samaba osang United Nations ajanga bendena lir, anungji alima nung ibai migrant tem senzüba lenmang tamajungtiba akumer.

Migrant tem azüoktsü mechi taoba ita European Union-i Tunisia den sen million \$118 alang tezüngzükteper ka yanglua lir.

Iba sen ya nisung shibelenba anendaktsütsü merangba, arütsü tashi itshiba aser migrant tem meyipa arur asoshi amshitsüba lir.

Italy indang far-right sorkari ozüing ka yangluba ajanga tzüyim nung kumzükurba rongtem ya Lampedusa mesüra Sicily nung masü saka meta talang nung aliba rongmendak anendaktsür.

Migrant tem aruba linük tesem ajungalen prokshidaktsütsü nukjidong nung lir ta Italy sorkari ashir saka NGOs temibo iba ozüing ya ajanga parnok patrol senzüba tesem nung mapang tajemba indokdakttsür ta ashir.

Hezbollah-i rara tenzükra Lebanon 'Stone Age'-i meyipa yoktsü: Israel

Jerusalem, Luroi/August 9

(Agencies): Hezbollah den rara tenzükra Lebanon 'stone age'-i meyipa aotsü ta Israel-i tekümdangtsü metetdakttsüogo.

Iran-i teyari agütsüba telungpur telok den hopta ishika linük ana tsüngda arrtsü nung mangatettep adoka aruba sülen Israel Defence Minister Yoav Gallant-i Mongolbarnü iba tekümdangtsü metetdakja liasü.

"Nenoki aibelen tesü. Onoki rara maginer. Ajisüaka nüburtem, sepaitem aser sovereignty kümzükur ayutsü atema onok renema lir," ta Gallant-i ashiba Times of Israel sangdong ka ajanga metetdakttsü.

Gallant-i Hezbollah indang Secretary-General Hassan Nasrallah dang, "nai taoba mapanga aibelenogo aser iba

taa aogog. Iba tesem nung tensa mejungi kümra mesüra mangatettep tali kuma ora onoki Lebanon 'Stone Age' dangi meyipa yoktsü," ta ashi.

Arrtsü semdangba mapang Gallant-isa, Israel-i nüngdak dang süra Hezbollah aser Lebanon meshimeshia samatsütsü asoshi tashi ajak amshitsü, ta ashi.

Israel-i amokmerenba dak sendakba nung Hezbollah-i tang tashi nung kecha osang agüja mali.

2006 küm Israel aser Hezbollah na tsüngda rara atokba sülen telok anapronglai kati ka amokmerena arudar, ajisüaka March ita Israel nung lenmang tezülen bomb pokdakttsüba koba parnok Hezbollah züngsem ka dak tonglokttsüogo, iba tatalokba sülen

tensa tamajungba kümogo.

Iba bomb pokdakttsüba ya Hezbollah puri tang tashi nung nangzükur mali.

Hopta ishika tsüngda arrtsü nung Lebanon nungertem, Hezbollah telok ka aser Israel nunger sepaitem tsüngda mangatettep adokogo.

Tawa arrtsü nung mangatettep aliba tesem nung süki ana yangluba densema Hezbollah teloki tensa tamajungba kümdakttsütsü asoshi rongshiba atema Israel-i parnok aija arudar. Kasa mapang nung Ghajar jila temeket nunga tensa mejungi kümogo.

Israel aser Lebanon na arrtsü ya 1978 küm nungi United Nations Interim Force in Lebanon (UNIFIL) nungi Peacekeeper temi nüka arudar.

Beijing tzümetsüng lendong nung asür 30dak tema jungogo

Beijing, Luroi/August 9

(Agencies): China yimtiba Beijing tawa tzümetsüng agi kongshiba sülen tekümzükur pongu densema iba lendong nung asür nisung 33 jungogo aser nisung 18 tashi samar tang tashi monguteti lir, ta ketdangtsürtemi metetdakttsü.

Otsüsütsüsa tawa tzünglu kanga sashia aruba sülen China yimtiba dak hopta tsüngda kanga mejungi kongshia infrastructure tem aika raksatsüba den yimti temeket nung aliba tesemtem aika metsüngogo.

Beijing nung tawa tsüingsang mejungi akümba sülen nisung 33 süogo aser nisung 18 samar tang tashi monguteti lir ta ketdangtsürtemi metetdakttsü. Nisungtem ya tzü

agi parnok alidak metsüngba aser kitem chirepba sülen taküm sama liasü.

Anogo aika tzünglu kanga sashia aruba sülen Beijing anüolen kanga mejungi kongshio aser iba tesem nung ki 59,000 chirepogo, ki 150,000 shi metsüngogo aser alu hectare 15,000 metsüngogo, ta yimti sorkari Bodhbarnü metetdakttsü.

Kasa mapang nung apu 100 dak tema densema lenmang aika raksaa, ta Beijing vice mayor Xia Linmao-i ashi.

Al Jazeera osangbener Katrina Yu-i Beijing nungi ashiba agi, Typhoon Doksuri-i hopta ka tejakdang China dak kongshia liasü saka tzümetsüng aser ki chirepba agi tang agi nüburtem nem timtem

agütsüdar.

China kübok tanga tesem nunga tzümetsüng kanga sashia arudar aser China anütoktiplen tzümetsüng lendong nung nisung aika asüba osang angazükogo.

Taoba hopta beijing nung ketdangtsürtemi ashiba agi, taoba ita lendong balala nung nisung 147 süogo. Asürtem rongnung nisung 142 tzümetsüng lendong mesüra tanga lendong nung süa liasü, ta China indang Ministry of Emergency-i ashi.

Beijing den kidanger Hebei province nunga nisung 15 asüba den nisung 22 samar tang tashi mongui aliba osang metetdakttsüogo. Northeastern Jilin nung nisung 14 asüba aser nisung ka samar bushiba indang Deobarnü metetdakttsüogo.

2nd Mkg Inter-ward Volleyball Tournament meraketa tenzükogo



Asayamung tenzuka mezung asayatsupur den Advisor Temjenmenba-i salemyonga aoba mapang tangokba noksa nung angur.

Mokokchung, Luoi/August 9 (TYO): Mokokchung nüburtemi yongya ataba 2 buba Mokokchung Inter-ward Volleyball Tournament August 9 nü yangi Multi-Purpose Sport Complex, Mokokchung nung Advisor, Transport & Technical Education, Gov. of Nagaland, Temjenmenba-i meraketa tenzüksüogo.

Iba asayamung ya Mokokchung District Volleyball Association aküm nung Kümlong Sporting Association-i sempet aketer lanurtem pei sempet arangshidaksütsü nükjidong yur taküm agi küm nabuba ayongzüker. Iba asayamung ya kümshi ayongba

asayamung ka südaksütsü tayongertem tejangraba lir.

Taküm iba sentong nung Mokokchung town kübok ward 9 - Sungkomen, Mongsenbai, Alempang, Lijaba Lijen, Artang, Majakong, Penli, Yimyu aser Kumlong ward-temi shilem agidar. Iba asayamung ya August 11 tashi asayaa amungtsü.

Iba asayamung shir ward-i bendir senpet sen 30,000/- aser atongdakba nem 20,000/- agütsütsü. Iba den nija senpet kar shima senpetsütsü. Iba asayamung shibai bendir, Mokokchung District Volleyball Association-i ayongba Imchaba Memorial Open Volleyball Trophy nung


tetendangba (audition) kecha mekai indangindanga shilem agitetsü maongka agütsütsü asoshi MDVA o tayonger na tenangzüktepba ka agia lir.

Advisor, Temjenmenba-i iba asayamung laokja jembidang, saisapong ajak nung tazüokbaji kanga tongtibang lir, ta ashi. Asayartem dak bendanga agütsüba aser jangrabangraba alitsüla. Saisapong ya ngujem tulu aliba luyim ka lir aser yangi sen aahtsü lenmang sadema lir, anungji, asayartemi ibai süoki ia agitsüla aser saisapongji pei taküm nung mapa ka kümdaksütsü asoshi merangtsüla, ta paisa tayongzükba agütsü.

Saisapong koba südir süaka ajakji nungitsüla aser asayartemjia ajungmesotsüla, ta paisa Mokokchung nüburtedang inyakdaksünüba olen ka shisem.

Asayamung tenzuka mezung asaya yaküm champions Sungkomen o Mongsenbai na asayaba, Sungkomen-i deciding nung 17-25, 30-28 & 25-14 agi takok angu. Tanabuba asaya Majakong o Penli na asayaba, Penli-i 25-17 & 26-24 agi akok. Tasembuba asaya, Lijaba Lijen o Alempang na asayaba Lijaba-i deciding nung 25-13, 22-25 aser 25-23 agi Alempang madak takok ngua liasü.

Julien Lopetegui-i Wolves coach mapa toktsüogo



Luroi/August 9, 2023 (Agencies): Premier League season tasenba tenzüksü lia Wolves coach Julien Lopetegui-i pa mapa toktsüogo. Club-i asayar ayokba aser alizükba dak sendakba nung pa mepelai mapa toktsüogo, ta osang ajanga metetdaksü.

Club sangdong ka ajanga Mongolbarnü ashiba agi, "Wolves aser Julien Lopetegui na pilatsü asoshi mulungtepogo aser iba ajanga Spain nung coach ya ita teku tashi club indang head coach aliba tembangogo."

"Ken o kar nung head coach aser club na tsüngda mangatetep aliba agizüktepogo aser pa den tenangzüktepba yanglur aliba ya tembang nung tajungba asütsü ta angatetepogo," ta club-isa metetdaksü.

Taoba Bournemouth head coach Gary O'Neil, shiba ita ishika ka tejakdang mapa nungi

anentsüogo, pai club nung Lopetegui melentsü akok ta osang ajanga metetdaksüogo.

Taoba mapang Spain aser Real Madrid coach Lopetegui ya toba küm November ita Bruno Lage melena shim. Pa shimba mapang club Premier League nung ponglang nung liasü, ajisüaka pa lenisüba nung Wolves pur jenjang 13buba nung tembanga liasü.

Ajisüaka arishi küm 56 tain coach ya transfer market nung club indang inyakyim agi mepelar, kechiyong summer transfer window nung first-team asayartem aikati club toktsürogo aser parnok temelen asayar ishika dang nguteta lir.

Wolves puri Ruben Neves, Conor Coady, Nathan Collins aser Raul Jimenez nung yokogo aser parnok melena Matt Doherty aser Tom King na dang free transfers nung anir aru.

Kasa mapang nung Lopetegui-i, "Ni Wolves aser club nung sendaka alirtem tarutsü tajungba ka asoshi imlaja atar aser iba club coach mapa abentsü atema kü nem maongka agütsüba atema kanga pelar," ta ashi.

"Iba club nung jangradema inyakogo. Maneni ni asayartem dang kanga pelaba lemsateper, shirnoki nükjidong tongtetsü atema takokba tashi meranga inyakogo aser ano fan temi tetenzük nungi ni parnok den ka ama dang bilemdaksü aser ni, kü staff tem aser ozü kibong danga kanga junga aruogo," ta paisa shisem.

Lopetegui indang staff, Pablo Sanz, Juan Peinado, Oscar Caro, Edu Rubio, Borja De Alba Alonso aser Daniel Lopetegui nungeria club toktsütsü.

Pa club nung adenba sülen pa lenisüba nung club-i league asaya teku akok. Iba mapang parnoki Liverpool aser Tottenham nata koka point table nung teyongtsü nung tembanga liasü.

"Club dak sendaka alirtem ajak tenüng nung ni Julien aser par staff tem dang parnoki bendanga agüja meranga inyakba atema kanga pelaba lemsateper," ta sporting director Matt Hobbs-i ashi.

ICC-i World Cup mapanglem yanglushitsü

New Delhi, Luroi/August 9 (Agencies): Imla aliba ama ajaki kanga yonga aliba India aser Pakistan na asaya October 14 nü Narendra Modi Stadium, Ahmedabad nung asayatsü ta ICC-i Bodhbarnü metetdaksü. Iba asayamung nung ano asaya ti mapanglem melenshitsuogo.

India aser Pakistan na asaya ya kasa tesem nung October 15 nü asayatsü liasü, saka anogo ka jelia asayatsü.

Ahmedabad Police-i BCCI dang October 15 nü security achayangtsü asoshi tasak asütsü, kechiyong iba anogo Hindu nung benjung Navratri tenzüksü ta ashiba sülen anogo melenshia liasü.

Iba asaya melenshiba sülen England aser Afghanistan na Delhi nung asayatsü aliba October 14 nü masü saka ghonda 24 lir 15 nü asayatsü.

Pakistan aser Sri Lanka na Hyderabad nung asayatsü aliba asaya October 12 masü saka October 10 nü asayatsü aser Australia o South Africa na asaya Lucknow nung October 12 melena October 13 nü asayatsü.

Kasaji New Zealand aser bangladesh na asaya October 14 nü Chennai nung asayatsü liasü saka tang October 13 nü day-night asayatsü.

Asayamung tetenzüklen England aser Bangladesh na Dharamsala nung asayatsü aliba asaya ya anüngdang asaya ka küma 10:30 ako nungi tenzüksü, koba day-night asaya ka liasü.

League stage tatemi November 12 nü asaya ana asayatsü aliba ya November 11-i atsüzükogo, kong Australia aser Pakistan na Pune nung anepdang 10:30 ako nungi tenzuka asayatsü aser England o Pakistan na asaya Kolkata nung 2:00 ako nungi tenzuka asayatsü.

Kasa mapang India league nung nung tatembangbuba asaya Netherlands den November 11 nü asayatsü aliba 12 nü bengaluru nung asayatsü.

Taküm ICC World Cup ya October 5 nü 2019 finalists England aser New Zealand na Narendra Modi Stadium, Ahmedabad nung asaya tenzüksü aser final kasa tesem nung November 19 nü asayatsü.

Melenshir atoktsüba mapanglem:

October 10 - England v Bangladesh - Dharamsala - 10:30 am IST

October 10 - Pakistan v Sri Lanka - Hyderabad - 2 pm IST

October 12 - Australia v South Africa - Lucknow - 2 pm IST

October 13 - New Zealand v Bangladesh - Chennai - 2 pm IST

October 14 - India v Pakistan - Ahmedabad - 2 pm IST

October 15 - England v Afghanistan - Delhi - 2 pm IST

November 11 - Australia v Bangladesh - Pune - 10:30 am IST

November 11 - England v Pakistan - Kolkata - 2 pm IST

November 12 - India v Netherlands - Bengaluru - 2 pm IST.

Inter Milan-i goalkeeper Yann Sommer alizükogo



Luroi/August 8, 2023 (Agencies): Inter Milan-i Andre Onana melena Switzerland nung goalkeeper Yann Sommer alizükogo aser pa team indang first-choice goalkeeper asütsü.

Inter-i, Bayern Munich nungi euro million 6 yong Sommer alizükba Hombarnü sangdonga liasü, ta Gazzetta dello Sport sangdong ka ajanga metetdaksü.

Inter-i pa alizükba ya Onana Manchester United dang euro million 51 agi ayongba shilem ka dang lir.

Borussia Mönchengladbach nung küm te sür tesadang asayaba sülen arishi küm 34 tain Sommer ya taoba season tesadang ka Manuel Neuer yiruba ajanga pa melena Bayern

nung goalkeeper mena liasü.

Taoba küm August ita Mönchengladbach nungi asayaba mapang Sommer-i, Bundesliga nung otsü tasen ka yanglua Bayern den asaya ka nung goal 19 tashi kümzüka liasü.

Onana taoba season Samir Handanovic den melentepa menogo, shiba den tenangzüktepba meyanglushi.

Sommer-i inter nung adentsü telemtetba agiba ya, pa asayaba yimya aser Inter coach Simone Inzaghi indang tasa putepba ajanga lir.

"Pa tasa ni asayaba yimya den kanga puteper. Ni team atema asayar tongtibang ka kümner," ta Sommer-i ashi, shiba Switzerland tenüng nungi 83 ben asayar lir.

BILEMDANGANG

"Tenüngsang agütsütsü atsüayonga teli."